

Minister Mike de Meza

Un momento sumamente IMPORTANTE pa pais Aruba

RECIENTEMENTE a firma un acuerdo entre Pais Aruba y Odinsa pa cu construcion di e Green Corridor. Esaki tabata un momento importante den e historia di nos isla particularmente p'e pueblo di pariba di brug.

"Pa yega e otro nivel mester tin cambianan grandi den infraestructura pa sostene e desaroyo," Minister de Meza a bisa.

El a splica cu no ta papiando solamente di e desaroyo di San

Nicolas, pero di tur e barionan rond di San Nicolas y cu esaki ta bay man den man cu algun di e mehoracionnan cu ya a tuma luga p'ariba, manera e trabaonan na Yuwana Morto Complex, De Vuijst, Esso Heights, Mabon, den e centro di San Nicolas y Yara, entre otro.

"San Nicolas y vecindario tin e ingredientenan pa crea oportunidadnan sumamente grandi, pero a base di e ingredientenan aki so nos no

ta yega e siguiente nivel. Atencion pa infraestructura ta sumamente necesario pa realisa e crecemento, desaroyo y progreso cu tur hende kier ta parti di dje," segun Minister de Meza.

E mandatario a bisa cu parti di e proyecto Green Corridor tambe ta inclui un "loop" cu ta conecta e rotonde di Pos Chiquito cu e rotonde di San Nicolas via di Yara, Brazil, Weg Fonteijn, Esso Ville y Bernardstraat, unda cu e barionan ey tambe lo wordo conecta cu e carretera principal y lo conoce pues mehoracionnan interesante. Por wak tur e partinan di e preparacionnan pa desaroyonan nobo pa San Nicolas, tanten cu ta sostene e desaroyonan existente, ta bin hunto pa forma e panorama completo.

Ya caba ta wak hopi interes di parti di inversionistanan local y internacional pa haci uzo di e incentivos fiscal introduci pa Gabinete Mike Eman 1 y no ta papia solamente di e caminda principal y e centro di San Nicolas

of e area di Sero Colorado/Colony, pero otro areanan tambe cu lo ta miho conecta pa medio di Green Corridor.

Esaki ta inclui no solamente proyectonan riba tereno di turismo, pero pa otro industrianan y servicionan tambe.

E speranza pa un reapertura di e refineria ta sigui bibo, y ta algo cu ainda ta sigui traha riba dje tur dia, pero tambe ta wak e Plan B pa e tereno di e refineria si no logra realisa e reapertura, Minister de Meza a expresa. Ta necesario pa tin tur dos escenario semper presente y den mente pa no perde, ni descarta oportunidadnan interesante na momento cu nan presenta.

"Lo mira porfin un desaroyo sostenibel grandi tumando luga," Minister de Meza a remarca.

"Esaki ta bay ta un otro epoca den desaroyo di Aruba. Esaki ta netamente y meramente pa bay riba e siguiente nivel pa por tin un progreso sostenibel na Aruba. Mi ta orguyoso di ta parti di Gabinete Mike Eman 1 y 2," el a finalisa bisando.

